



Međunarodni sud za krivično
gonjenje osoba odgovornih za
teška kršenja međunarodnog
humanitarnog prava počinjena
na teritoriji bivše Jugoslavije
od 1991. godine

Predmet br. IT-08-91-T
Datum: 3. decembar 2010.
Original: engleski

PRED PRETRESNIM VIJEĆEM II

U sastavu: sudija Burton Hall, predsjedavajući
sudija Guy Delvoie
sudija Frederik Harhoff

Sekretar: g. John Hocking

Odluka od: 3. decembra 2010.

TUŽILAC

protiv

MIĆE STANIŠIĆA I STOJANA ŽUPLJANINA

JAVNO

**ODLUKA KOJOM SE ODOBRAVA ZAHTJEV MIĆE STANIŠIĆA ZA
PRIVREMENO PUŠTANJE NA SLOBODU TOKOM ZIMSKOG SUDSKOG
RASPUSTA**

Tužilaštvo
gđa Joanna Korner
g. Thomas Hannis

Vlada Republike Srbije
posredstvom Ambasade Republike Srbije
u Nizozemskoj, Haag
Vlada Kraljevine Nizozemske

Branioци optuženih
g. Slobodan Zečević i g. Slobodan Cvijetić za Miću Stanišića
g. Dragan Krgović i g. Igor Pantelić za Stojana Župljanina

PRETRESNO VIJEĆE II (dalje u tekstu: Pretresno vijeće) Međunarodnog suda za krivično gonjenje osoba/lica odgovornih za teška kršenja međunarodnog humanitarnog prava počinjena na teritoriji bivše Jugoslavije od 1991. godine (dalje u tekstu: Međunarodni sud);

RJEŠAVAJUĆI PO Zahtjevu Miće Stanišića za privremeno puštanje na slobodu tokom predstojećeg zimskog raspusta, podnesenom 5. novembra 2010. s povjerljivim dodacima, u kom odbrana Miće Stanišića (dalje u tekstu: odbrana) traži da se Mići Stanišiću odobri privremeno puštanje na slobodu u kraćem trajanju tokom zimskog sudskog raspusta u periodu od 18. decembra do 10. januara 2011. (dalje u tekstu: zimski raspust), pod istim uslovima pod kojima je ranije puštan na slobodu, odnosno pod uslovima koje Pretresno vijeće bude smatralo primjerenim na osnovu pravila 65(C);¹

IMAJUĆI U VIDU argumente odbrane da se Mićo Stanišić dobrovoljno predao Međunarodnom sudu samo četiri dana nakon što je službeno obaviješten o optužnici, da je dobrovoljno saradivao s tužilaštvom i uvijek se pridržavao uslova privremenog puštanja na slobodu, uključujući sve izmjene tih uslova, kao i da nema nikakvog rizika da Mićo Stanišić pobjegne ili predstavlja ikakvu opasnost za žrtve, svjedoke i druge osobe;²

IMAJUĆI U VIDU argument odbrane da će ona u najvećem dijelu perioda raspusta raditi iz Beograda i da je sa stanovišta "logične i efikasne pripreme za nastavak sudskog postupka" važno da Mićo Stanišić bude u Beogradu tako da može biti u bliskom kontaktu s braniocima i pomagati im u pripremanju odbrane;³

IMAJUĆI U VIDU da je tužilaštvo 8. novembra 2010. usmeno odgovorilo da ne zauzima nikakav stav povodom Zahtjeva i prepušta Pretresnom vijeću da odluči po svom nahođenju;⁴

IMAJUĆI U VIDU Garanciju Vlade Republike Srbije (dalje u tekstu: Srbija) zavedenu 24. novembra 2010., u kojoj se, između ostalog, navodi da se Srbija "obavezuje da će se, ukoliko [Pretresno vijeće] odobri optuženom Mići Stanišiću privremeno puštanje na slobodu [...]

¹ Zahtjev g. Stanišića za privremeno puštanje na slobodu tokom predstojećeg zimskog sudskog raspusta, 5. novembar 2010. (dalje u tekstu: Zahtjev), par. 1-2.

² Zahtjev, par. 10.

³ Zahtjev, par. 10.

⁴ Pretres, 8. novembar 2010., T. 17041.

pridržavati svih naloga koje izda Pretresno vijeće [...] tako da optuženi može u svako doba stupiti pred [...] Međunarodni sud";⁵

IMAJUĆI U VIDU poruku Vlade Kraljevine Nizozemske, države domaćina (dalje u tekstu: Nizozemska), zavedenu 22. novembra 2010., u kojoj ona izjavljuje da se ne protivi Zahtjevu za privremeno puštanje na slobodu;⁶

UZIMAJUĆI U OBZIR da, na osnovu pravila 65 Pravilnika o postupku i dokazima, pretresno vijeće može izdati nalog za privremeno puštanje na slobodu ako se uvjerilo da će se optuženi pojaviti na suđenju i da, u slučaju puštanja na slobodu, neće predstavljati opasnost ni za jednu žrtvu, svjedoka ni bilo koju drugu osobu i da za puštanje optuženog na slobodu pretresno vijeće može odrediti bilo koje uslove koje smatra primjerenim;

PODSJEĆAJUĆI da je Mićo Stanišiću ranije u pet navrata odobravano privremeno puštanje na slobodu tokom pretpretresne faze i suđenja pod uslovima koje je odredilo Pretresno vijeće i koje je Mićo Stanišić u potpunosti ispoštovao;⁷

UZIMAJUĆI U OBZIR da se Mićo Stanišić uvijek pridržavao uslova privremenog puštanja na slobodu koje je odredilo Pretresno vijeće i da se pojavljivao na suđenju, kako mu je bilo naloženo;

UZIMAJUĆI U OBZIR da se, kada je u ranijim prilikama odobravalo privremeno puštanje na slobodu Miće Stanišića, Pretresno vijeće uvjerilo da on nije predstavljao nikakvu opasnost za žrtve, svjedoke i druge osobe;⁸

UZIMAJUĆI U OBZIR da se ranija procjena Pretresnog vijeća u vezi s rizikom bjekstva Miće Stanišića ili opasnosti koju on predstavlja za žrtve, svjedoke i osobe povezane s predmetom nije promijenila;

⁵ Dodatak zahtjevu g. Stanišića za privremeno puštanje na slobodu tokom predstojećeg zimskog sudskog raspusta, 23. novembar 2010., Dodatak A.

⁶ Dopis države domaćina, 22. novembar 2010.

⁷ *Tužilac protiv Miće Stanišića*, predmet br. IT-04-79-PT, Odluka po Zahtjevu Miće Stanišića za privremeno puštanje na slobodu, 19. juli 2005. (dalje u tekstu: Odluka od 19. jula 2005.), Nalog kojim se ponovo odobrava privremeno puštanje na slobodu, 10. juli 2008.; Nalog o ponovnom stupanju na snagu privremenog puštanja na slobodu, 12. juni 2009.; Odluka kojom se odobrava Zahtjev g. Stanišića za privremeno puštanje na slobodu tokom zimskog sudskog raspusta, 11. decembar 2009. (dalje u tekstu: Odluka od 11. decembra 2009.); Odluka kojom se odobrava zahtjev Miće Stanišića za privremeno puštanje na slobodu tokom ljetnog sudskog raspusta, 16. juli 2010. (dalje u tekstu: Odluka od 16. jula 2010.).

⁸ V. Odluka od 19. jula 2005., par. 19; Odluka od 11. decembra 2009., str. 4; Odluka od 16. jula 2010., str. 3.

UZIMAJUĆI U OBZIR da se Pretresno vijeće uvjerilo u pouzdanost garancija Srbije i prima na znanje poruku koju je uputila Nizozemska;

UZIMAJUĆI U OBZIR da će zimski sudski raspust trajati od 18. decembra 2010. do 10. januara 2011.;

NA OSNOVU pravila 65 Pravilnika;

ODOBRAVA Zahtjev; i

NALAŽE da se Mićo Stanišić privremeno pusti na slobodu u skladu sa sljedećim odredbama i uslovima:

1. Čim to bude izvodljivo, 17. decembra 2010. godine ili poslije tog datuma, Mićo Stanišić će biti prebačen na aerodrom Schiphol u Nizozemskoj od strane za to određenih organa Nizozemske;
2. Na aerodromu Schiphol Mićo Stanišić će biti privremeno predat pod nadzor službenog predstavnika Srbije, koji će biti u pratnji Miće Stanišića tokom preostalog dijela njegovog putovanja u Srbiju i do mjesta njegovog boravka;
3. Tokom povratka Miće Stanišića u njegovoj pratnji će biti službeni predstavnik Srbije, koji će Miću Stanišića predati pod nadzor organima Nizozemske na aerodromu Schiphol 7. januara 2010. godine ili prije tog datuma radi njegovog prebacivanja nazad u PJUN;
4. Tokom perioda privremenog boravka na slobodi Mićo Stanišić će se pridržavati sljedećih uslova, a organi Srbije, uključujući lokalnu policiju, obezbijediće poštovanje tih uslova;
 - i. da boravi u svom domu na adresi navedenoj u povjerljivom Dodatku A priloženom Zahtjevu;
 - ii. da ostane u granicama teritorije grada Beograda;
 - iii. da preda svoj pasoš Ministarstvu unutrašnjih poslova Srbije;
 - iv. da se svakodnevno prije 13:00 sati javlja policiji u Beogradu, u lokalnoj policijskoj stanici koju odrede organi Srbije;

- v. da pristane na to da se Ministarstvo unutrašnjih poslova raspituje o njegovom prisustvu kod lokalne policije i da ga povremeno nenajavljeno posjećuju predstavnici tog Ministarstva ili osoba koju odredi sekretar Međunarodnog suda;
- vi. da ne stupa ni u kakav kontakt sa žrtvama, svjedocima ili potencijalnim svjedocima i da na njih ni na koji način ne vrši pritisak, odnosno da ni na koji drugi način ne ometa postupak ili provođenje pravde;
- vii. da o svom predmetu ne razgovara ni s kim, uključujući medije, izuzev sa svojom odbranom;
- viii. da nastavi saradivati s Međunarodnim sudom;
- ix. da se strogo pridržava svih uslova koje postave vlasti Srbije, a koji su potrebni da bi one mogle izvršavati svoje obaveze u skladu s ovom Odlukom i datim garancijama;
- x. da se vrati na Međunarodni sud 7. januara 2011. godine ili prije tog datuma; i
- xi. da se strogo pridržava eventualnih daljnjih naloga Međunarodnog suda kojima se mijenjaju ili ukidaju odredbe njegovog privremenog puštanja na slobodu;

TRAŽI od Srbije da preuzme odgovornost za sljedeće:

- a) da imenuje službenog predstavnika svoje vlade pod čiji nadzor će Mićo Stanišić biti privremeno predat i koji će ga pratiti od aerodroma Schiphol do Srbije i njegovog mjesta boravka, kao i da imenuje službenog predstavnika svoje vlade koji će biti u pratnji Miće Stanišića od njegovog mjesta boravka do aerodroma Schiphol, gdje će Mićo Stanišić biti predat pod nadzor organa Nizozemske, koji će ga prebaciti nazad u PJUN;
- b) da, prije puštanja na slobodu Miće Stanišića iz PJUN-a, obavijesti sekretara Međunarodnog suda o imenu jednog ili više službenih predstavnika koji će biti imenovani u skladu s prethodnim potparagrafom;
- c) za ličnu bezbjednost i sigurnost Miće Stanišića tokom privremenog boravka na slobodi;

- d) za sve troškove u vezi s prebacivanjem Miće Stanišića sa aerodroma Schiphol u Beograd i nazad;
- e) za sve troškove u vezi s bezbjednošću Miće Stanišića tokom privremenog boravka na slobodi;
- f) da svake sedmice podnosi Pretresnom vijeću pismeni izvještaj o tome kako se Mićo Stanišić pridržava odredbi ove Odluke;
- g) da smjesta uhapsi i pritvori Miću Stanišića ukoliko on prekrši bilo koji od uslova iz ove Odluke; i
- h) da smjesta izvijesti Pretresno vijeće o eventualnom kršenju gorenavedenih uslova;

UPUĆUJE sekretara Međunarodnog suda da se konsultuje s Ministarstvom pravde Nizozemske u vezi s praktičnim aspektima privremenog puštanja Miće Stanišića na slobodu i da ga zadrži u pritvoru PJUN-a u Haagu dok sekretar ne bude obaviješten o imenu imenovanog službenog predstavnika Srbije pod čiji će nadzor Mićo Stanišić biti privremeno predat; i

TRAŽI od nadležnih organa Nizozemske da se postaraju za to da se Mićo Stanišić pod stražom prebaci iz PJUN-a i preda pod nadzor imenovanog službenog predstavnika Srbije na aerodromu Schiphol i, isto tako, da od imenovanog službenog predstavnika Srbije preuzmu nadzor nad Mićom Stanišićem 7. januara 2011. godine ili prije tog datuma kako bi on pod stražom bio prebačen nazad u PJUN.

Sastavljeno na engleskom i francuskom jeziku, pri čemu je engleska verzija mjerodavna.

/potpis na originalu/

sudija Burton Hall,
predsjedavajući

Dana 3. decembra 2010. godine
U Haagu,
Nizozemska

[pečat Međunarodnog suda]